



Gabinete Fronteiras  
Marítimas  
Konsellu ba Delimitasaun  
Definitiva Fronteiras  
Marítimas  
Dili, Timor-Leste  
+670 7742 5544  
info@gfm.tl

Gabinete Fronteiras Marítimas mak Sekretáriadu ba Konsellu ba Delimitasaun Definitiva ba Fronteiras Marítimas, ne'ebé responsabiliza ba negosiasaun ba fronteiras marítimas ho Indonézia no Austrália.

## Konsellu Amerikanu ba Líderes Polítikus Foinsa'e (ACYPL) vizita Timor-Leste, 8-13 abril 2019

Konsellu Amerikanu ba Líderes Polítikus Foinsa'e (ACYPL) ne'e nu'udar organizasaun non-profit ne'ebé promove koñesimentu global no haburas relasaun entre líderes jersaun foun sira iha mundu tomak. ACYPL fó oportunidade ba líderes foinsa'e sira hodi bele aprende no troka idea ba malu kona-ba asuntu internasional. Sira nia programa ne'e oferese interkambiu ne'ebé klean tebes ba partisipante sira bele esperiensa kultura seluk no aprende kona-ba governasaun no política iha nasaun seluk nian.

Governu Timor-Leste ho ACYPL estabelese ona parseria ida dezde 2017, no lideres Timoroan foinsa'e sira vizita tiha ona Amérika no delegasaun foinsa'e Amérikanu sira mos vizita tiha ona Timor-Leste. Delegasaun ida foin lalais ne'e mai vizita Timor-Leste iha fulan abril. Sira vizita fatin istóriu no kultural sira, hasoru malu ho líderes politikos no comunidade sira, hasoru malu ho foinsa'e Timoroan sira, no aprende kona-ba oinsa mak ita proteje vida mariña iha illa Ataúro.



Delegasaun ACYPL iha Uma Amerika no Agora Food Studio,  
9 abril 2019

## Forum Mundial dalima kona-ba Diálogu Interkultural, Baku, Azerbaijaun, 2-3 maiu 2019

Governu Azerbaijaun sai uma nain ba Forum Mundial ba dalima hodi haree kona-ba Diálogu Interkultural. S.E. Xefe Negosiador Xanana Gusmão, nu'udar laureadu North-South Centre iha 2002, nune'e simu konvite ida hodi fó diskursu ida ba iha Forum ne'e. Forum ne'e ezamina papel kritíku Diálogu Interkultural nian hodi harí solidariedade umana no ajuda kontra violensia no diskriminasaun. Iha nia diskursu, Xefe Negosiador ko'alia kona-ba direitus umanus, demokrasia no estadu de direitu nia importansia, nune'e mos rekoñese no respeita diferensia iha nasaun laran, comunidade no entre ema idak-idak. Nia hakotu nia diskursu hodi hateten katak mundu prezisa atu haforsa tan umanizmu, konviksaun no dedikasaun hodi promove umanizmu hamutuk no futuru ne'ebé hanesan.



S.E Xefe Negosiador Xanana Gusmão partisipa iha Forum  
Mundial ba dalima kona-ba Diálogu Interkultural, Baku,  
Azerbaijaun, 2-3 maiu 2019

## Vizita Konzunta ho Indonézia kona-ba Fronteiras Terestres, 29 abril to'o 15 maiu 2019

Delegasaun husi Timor-Leste ho Indonézia halao vizita konjunta ida ba segmentus ne'ebé seidauk rezolve, iha Noel Besi/Citrana no BidjaelSunan/Oben. Vizita ne'e hanesan hakat importante tebes ida hodi bele hetan rezolusaun ba segmentus ikus fronteiras terestres nian. Relatóriu vizita konjunta ne'e nian delegasaun rua ne'e aprezena iha reuniaun espesial ida iha 1 jullu, iha Bali, lora ida molok halao Oficial Senior nia Konsultasaun kona-ba Fronteiras Terestres.



Timor-Leste nia delegasaun, Oe-Cusse, 15 maiu 2019

## Konsultasaun Dalima Oficial Senior nian kona-ba Fronteiras Terestres, Bali, 1-3 jullu 2019

Konsultasaun dalima Oficial Senior nian kona-ba Fronteiras Terestres entre Timor-Leste no Indonézia ne'e halao iha Bali iha 2-3 jullu 2019. Reuniaun ne'e halao ho espíritu amizade no kooperasaun, no lao ona ho progresu boot hodi finaliza ita nia fronteiras terestres.



Timor-Leste nia delegasaun, Bali, 3 jullu 2019

## Reuniaun esploratória kona-ba fronteiras marítimas, Bali, 4-5 jullu 2019

Halao Reuniaun Esploratória kona-ba fronteiras marítimas ho Indonézia iha Bali iha 4 no 5 jullu 2019. S.E. Xefe Negosiador Xanana Gusmão mak lidera delegasaun Timor-Leste ne'ebé inklui S.E. Embaixador Roberto Soares, Asistente Espesial ba Xefe Negosiador no Xefe Ekipa Técnica ba Negosiasiun Fronteiras Terestres; Elizabeth Exposto, Diretora Ezekutiva ba GFM; no Marcos da Costa, Konselleiru Timor-Leste nian ba iha Embaixada Jakarta. Reuniaun lora rua ne'e ho rezultadu diak no tau baze ida metin hodi hahú negosiasiun formal iha 2019 nia laran.



Timor-Leste no Indonézia nia delegasaun, Bali, 5 jullu 2019

## Submete ba Konsellu Ministrus hodi analiza no aprova proposta rezolusaun hodi ratifika Tratadu Fronteira Marítima, 8-9 jullu 2019

Ho vizaun ida katak Tratadu Fronteira Marítima ne'e sei vigora iha 30 agostu 2019, entaun prezisa halao prosedimentu legal nesesaria iha fulan jullu nia laran. Konsellu Ministrus hasoru malu ho Xefe Negosiador iha 8 no 9 jullu hodi ko'alia, kona-ba ratifikasaun Tratadu entre Timor-Leste no Austrália, kona-ba sira

idak-idak nia fronteiras marítimas iha Tasi Timor. Konsellu Ministrus halo revizaun no aprova proposta leislasaun no dokumentu nesesaria sira seluk, ne'ebé hanesan hakat ikus molok haruka ba Parlamentu Nasional hodi ratifika Tratadu ne'e.



## Parlamentu Nasional Ratífika Tratadu Fronteira Marítima, 23 Jullu 2019

S.E. Xefe Negosiador Xanana Gusmão, S.E. Ministru Agio Pereira, no S.E. Ministra Interina Sara Brites, hamutuk ho ekipa negosiasaun, aprezena ona ba Komisaun B, C, no D Parlamentu Nasional nian iha 16-17 jullu 2019, Tratadu Fronteira Marítima no lei proposta 4: Alterasaun ba Lei Tributária, Rejime Laboral no Migratóriu Espesial, Alterasaun ba Lei Atividades Petrolíferu, no Alterasaun ba Fundu Petrolíferu.

Hafoin liutiha husi debate ne'ebé naruk no makas, Parlamentu Nasional ratífika ona Tratadu Fronteira Marítima istóriu ne'e no aprova mos lei proposta 4 ne'e iha 23 jullu 2019. Tratadu ho lei hirak ne'e Parlamentu haruka ona ba Prezidente Repúblika hodi promulga no publika.

Tratadu istóriu ne'e, ne'ebé asina iha 6 marsu 2018 iha sede ONU nian iha Nova lorke, iha objetivu prinsipal rua: atu delimita áreas marítimas entre Timor-Leste no Austrália iha Tasi Timor, no estabese rejime espesial ba Kampu Greater Sunrise hodi fó benefísiu ba nasaun rua hotu.

Lei sira ne'ebé presiza mos Parlamentu Austrália nian aprova ona, no ratífika Tratadu ne'e iha 29 jullu 2019.



Timor-Leste nia Parlamentu Nasional, 23 jullu 2019

## Vizita Delegasaun Kongresista (CODEL) Amerikanu no jantar boas-vindas husi Xefe Negosiador, 28 jullu 2019

S.E. Xanana Gusmão, nu'udar Xefe Negosiador no Prezidente ba Komisaun Organizadora ba Selebrasaun Konsulta Popular nian ba dala 20, oferese jantar boas-vindas ida ba Delegasaun Kongresista (CODEL) ne'ebé vizita Timor-Leste iha 28 jullu 2019. Ida ne'e hanesan CODEL ba daruak mai vizita Timor-Leste, tuir fali ida uluk iha 2015. Kongresu Amerikanu sempre fó apoiu makas ba Timor-Leste nia luta ba independensia, no sempre fó apoiu ba ita nia luta ba ita nia direitu ba fronteiras marítimas ho dame no justu tuir lei internasional.

CODEL ne'e Distintu David Price, Representativu ba North Carolina mak lidera, no inklui: Distintu Vern Buchanan, Representativu ba Florida (Vise-Xefe); Distinta Susan Davis, Representativa ba California; Distintu Gerry Connolly, Representativu ba Virginia; Distintu David Cicilline, Representativu ba Rhode Island; Distintu Neal Dunn, Representativu ba Florida; no Distintu John Rutherford, Representativu ba Florida.

Xefe Negosiador agradece ba Kongresista sira no liu-liu ba Kongresista David Cicilline husi Rhode Island, ne'ebé fó apoiu makas ba Timor-Leste nia direitu ba fronteiras marítimas iha Tasi Timor. Iha mos líderes importante sira seluk ne'ebé partisipa iha jantar ne'e hanesan S.E. Kathleen Fitzpatrick, Embaixadora Estados Unidos nian; S.E. Arão Noé da Costa Amaral, Prezidente Parlamentu Nasional; Dr. José Ramos-Horta, eis-Prezidente no Laureadu Nobel da Paz; Dr. Rui Maria de Araújo, eis-Primeiru-Ministru; no membrus parlamentu no governu sira seluk.



(K-L) Distintu David Cicilline, Distintu David Price no S.E. Kathleen Fitzpatrick, Dili, 28 jullu 2019

## Lansamentu Kim McGrath nia livru "Crossing the Line", Lisboa, 26 jullu 2019

S.E. Xefe Negosiador Xanana Gusmão, durante nia vizita ofisial ba Lisboa iha 22-27 juñu 2019 hodi tuir Konferensia Rekursu Natural no Reuniaun Ministerial g7+ nian balu, nune'e mos aproveita oportunidade ida ne'e hodi lansa Kim McGrath nia livru "Crossing the Line". Kim McGrath nu'udar investigadora Australiana ida ne'ebé halao peskiza ne'ebé klean tebes kona-ba Austrália nia istória iha Tasi Timor. Porto Editora agora publika ona livru ne'e iha lian Portugueza, no iha lansamentu ne'e ema liu husi 200 mak atende, atu hakarak hatene liu tan kona-ba kapitulu importante ida ne'e iha Timor-Leste nia istória.



Lisboa, Portugal, 26 jullu 2019



## GFM nia Sesaun Fahe Informasaun

Gabinete Fronteiras Marítimas (GFM) kontinua fahe informasaun kona-ba Timor-Leste nia fronteiras marítimas iha Tasi Timor ba públiku inklui universidade, eskola sekundária, sosiedade sivil no ajensia governu nian.

Iha 22 maiu 2019, GFM oferese workshop ida kona-ba Delimitasaun Fronteiras Marítimas ne'ebé Dr. Robin Cleverly, Peritu Tékniku no Konselleiru Timor-Leste nian mak fó. Workshop ne'e kobre: 1) sukat tasi hodi delimita tasi teritorial; 2) fahe tasi hodi dada liña ekidistansia; no 3) halo ezersísiu delimitasaun hodi hetan fronteiras ne'ebé ekitativa. Ema liu husi 100 husi ministériu relevante sira mak partisipa.

Iha 30 maiu 2019 no 23 jullu 2019, estudante husi universidade no sekundária sira konvida GFM hodi fahe informasaun kona-ba Timor-Leste nia fronteiras marítimas. Estudante sira partisipa ho diak no husu pergunta importante no relevante kona-ba Tratadu istóriu ne'ebé asina iha 6 marsu 2018 iha Nova lorke no mos progresu dezenvolvimentu kampu Greater Sunrise nian.

Iha 30 jullu 2019, NGO Forum (FONGTIL) mos konvida GFM hodi ko'alia ba NGO lokal sira kona-ba Tratadu Fronteira Marítima entre Timor-Leste ho Austrália. Sira kongratula Governu, liu-liu ba Xefe Negosiador no ekipa negosiasaun, ba Tratadu ne'ebé Parlamentu Nasional ratifika ona no apresia kolaborasaun diak ne'ebé kontinua hodi dezenvolve Timor-Leste.

*Canossa, 30 maiu 2019*



*Ezersísiu Delimitasaun, Hotel Timor, 22 maiu 2019*

**Boletim Notícias**  
**Abril–Jullu**  
**2019**

Atu hetan tan informasaun bele kontaktu:

**Gabinete Fronteiras Marítimas**

Konsellu ba Delimitasaun Definitiva ba Fronteiras Marítimas

Governu Repúblika Demokrátika Timor-Leste

info@gfm.tl

+670 7742 5544



**Gabinete**  
**Fronteiras**  
**Marítimas**